



9. august 2013

UKA 2013/33

Inatsartut Suleriaasianni § 33 naapertorlugu Inatsisartuni aalajangiiffigisassatut siunnersuut imaattoq saqqummiuppara:

**Nunatsinni avatangiisinut aningaasaateqarfimmik pilersitsinissaq sulissutigeqqullugu kiisalu Inatsisartut aningaasanut inastisaanni konto 24.11.23-mi naatsorsuutit, nukissiornermi ikummatissanut avatangiisit pillugit akitsuutikkut isertitat avatangiisinut aningaasaateqarfimmut atugassanngorlugit immikkoortinneqartalernissaat sulissutigeqqullugu Naalakkersuisut peqquneqarnissaannik Inatsisartut aalangiiffigisassaattut siunnersuut.**

(Inatsisartunut ilaasortaq Kim Kielsen, Siumut)

**Tunngavilersuut:**

Avatangiisinut, eqqakkanik passussinnermut, uuliaarluernermit, upalugaarsimanermit il.il. inatsisit misissuataareerlugit, pineqartut pillugit annertunerusumik iliuseqarusussuseqarneq immaqalu aamma aningaasatigut iliuseqarusussutsip killeqarnera malunnarpoq, naak pineqartut nunarsuarmioqataaneq aamma eqqarsaatigalugu pingaaruteqarluinnaraluartut.

Kommunit ilaasa aningaasaqarnertik pissutigalugu eqqakkanik passussinissamut pisussaaffitsik tamaat naammassisinnaanngilaat, taamaammallu eqqakkat immikkoortiterneqaratik avatangiisillu mianerineqaratik eqqaavissuarnut assigiinngitsunut eqqaannarneqartarlutik.

Avatangiisinut aningaasaateqarfimmik pilersitsinitsigut kommuninut innuttaasunullu eqqakkat avatangiisinut navianaatillit pitsaaneruserumik passunneqartarnissaat kiisalu avantangiisinut eqqummaarinneruserumik pissusilersornermut tunngasunik politikikkut piumasqaatit naammassisarnissai ajornannginneruserumik angusinnaalissavagut. Avatangiisinut aningaasaateqarfiup aningaasaataanik atuineq maleruagassanik aalajangersakkanik tunngaveqartumik ingerlanneqassaaq, imatullu assersuutigalugu atuisoqarsinnaassaaq: imip atoriikkap kuutsitap salinneqarnissaanut tapiissutinut, eqqakkanik ikuallaaviit ingerlanneqarnerannut tapiissutinut, pinngortitaq pillugu ilisimatusarnernut tapiissutinut, paasisitsiniaanernut kiisalu pinngortitaq avatangiisillu pillugit oqallinnernut aammalu allanut issittumi avatangiisitsinnut innarlujasumut tunngatillugu suliniutinut tapiissutinut.

Avatangiisit piujuaannartinnissaat pillugit ilisimasat allallu siaruarterlugillu patajaallisarneqarnissaat tamatsinnut pingaartuuvoq, tamakkumi siulitsinnit kingornussavut kinguaatsinnut ingerlatseqqitassarigatsigit.

Pissutsillu taamatut ingerlaqqinneranni nioqutissiatta pinngortitameersut anneruserumik avataaniit soqutigineqarnerulersinnaapput, nunatsinnimi avatangiisinut aningaasaateqarfimmik pilersitsinitsigut pinngortitamik taassumalu pisuussutaanik piujuaannartitsinermik pingaartitsinerput nunarsuarmioqatitissinnut takutissagatsigu.

Nukissiornermi ikummatissanut avatangiisit pillugit akitsuutikkut isertitat avatangiisinut aningaasaateqarfimmut siunissami nakkartinneqartalernissaat matumuuna siunnersuutigaaara.

2006-imi Inatsisartut upernaakkut ataatsimiinneranni Siumumit avatangiisinut aningaasaateqarfimmik pilersitsinissamik siunnersuut siullermik saqqummiukkatsigu, assersuutitut taavarput uuliamik ikummatissat tamarmik literimut 5 øremik avatangiisinut tunngasumik akitsuuserneqarsinnaanerat.

Naalakkersuisulli 1. januar 2011 aallernerifigalugu uuliamik ikummatissat literimut 10 øremik avatangiisinut tunngasumik akitsuuserpaat. Taamatut akitsuusiinermi aalisartut piniartullu umiatsiaararsortut ukiumut akitsuutinut 300 kr. missaannik aningaasartuuteqalersinneqarput, taakkumi 2005-imi misissueqqissaarnerup kingorna nalunaarusiami ukiumut ikummatissamik 2.000 – 3.000 literit akornani atuisartut uppernarsarneqarmat, taamatullu kilisaataatillit ikummatissanillu annertunerusumik atuisut allat suli annerusumik atuisarmata aningaasartuuneqarnerulersinneqarlutik.

Taamattaq illuutillit ukiumut 6.000 – 7.000 literimik uuliamik atuisutut missingerneqartut, ukiumut kr. 700 missaanni aningaasartuuteqarnerulersinneqarlutik.

Ullumikkut avatangiisinut tunngasumik akitsuummumut tunngatillugu akitsuummik isertitat avatangiisinik pitsanngorsaanerumut atorneqaranik toqqaannartumik nunatta karsianut nakkartinneqartarnerat ajornartorsiutaavoq.

2012-mut Inatsisartut aningaasanut inatsisaanni naatsorsuutigineqarpoq nukissiornermi ikummatissanut avatangiisit pillugit akitsuusiinikkut 20 mio. kr.-nit isertinneqassasut.

Tunisassiat allat avatangiisinut innarliisinnaasut 25 – 50 øremik akitsuuseraanni suli aningaasat amerlanerusut avatangiisinut aningaasaateqarfimmumut isertinneqartalersinnaapput, tamanna aamma uagut atuisartut avatangiisinut isiginneriaasitta pitsaanerulerneranik piujuaannartitsinissamillu pigaartitsinerulernitsinnik kinguneqassaaq.

Inatsisartut Aningaasaqarnermut Akileraartarnermullu Ataatsimiititaliaat akitsuutit annertussusissaat pillugit siunnersuusiorderup saniatigut nioqquutissiat allat suut akitsuuserneqarsinnaanerannik siunnersuummik saqqummiisussaatinneqassasoq isumaqarpunga. Nunani issittumiittuni ineriartorneq siuariarsimaqaaq taamaammatt avatangiisinut aningaasaateqarfimmik pilersitsinissaq avaqunneqarsinnaanngilaq, taamaalioruttami aatsaat nunatsinni issittumilu pinngortitarsuatta alianaaqisup piujuaannartinnissaa eqqarsaatigalugu tamatta piunasaqaativut qaffasissut naammassisinnaagatsigit.

### **Aningaasatigut allaffissornikkullu sunniutissat:**

Avatangiisinut aningaasaateqarfiup pilersinnissaa allaffissornikkut ingerlanneqassaaq tamannalu allaffimmiup AC-p ataatsip ukiumik ataatsimik sulineranik, tassa aningaasanngorlugu 500.000 kr.-nik naleqassanganneqarpoq. Avatangiisinut aningaasaateqarfiup ulluinnarni ingerlanneqarnissaa allaffissornikkut AC-t pingasut ukiumut sulinerannik, aningaasanngorlugu 1.5 mio. kr.-nik naleqassanganneqarpoq. Avatangiisinut aningaasaateqarfiup siulersuisuinut aningaasartuutissai ukiumut 500.000 kr.-niunissaat naatsorsuutigineqarpoq, tamatumalu saniatigut ininik attartornermut allatigullu allaffissornikkut aningaasartuutinut ukiumut 1 mio. kr.-nik aningaasartuuteqassanganneqarluni. Tassa avatangiisinut aningaasaateqarfik ukiumut 3 mio. kr.-nik aningaasartuutaasassasoq missingiunneqarpoq.

Nukissiornermi ikummatissanut avatangiisit pillugit akitsuutikkut isertitat avatangiisinut aningaasaateqarfimmumut atugassanngorlugit immikkoortinneqartalernissaaq soorunami allatigut isertitsitassarsiorinissamik sipaaruteqarnissamilluunniit malitseqassaaq.